

تورک تاریخ انجمنی

مجموعی

۱ مایس
۱۹۲۶

اون آلتنجی سنه
نومرو ۱۵ (۹۲)

۱۲۵۳ سنه سنده

قاوالالی محمد علی پاشا ایله بر ملاقات

۱۲۵۳ سنه سنده مصر والیسی قاوالالی محمد علی پاشانک آمال و مقاصدینی آ کلامق ایچون مصره مأموراً صارم بک کوندرلشدی . صارم بکک ، قاوالالی محمد علی پاشا ایله صورت ملاقاتنه و محمد علی پاشانک افکار و مطالعاتنه دئر یازمش اولدوغی مفصل تقریر ، محمد علی پاشانک اک کیزلی حسلرینی و اخلاق و طبایعی کویسترمکله برابر مصر مسئله سنکده اک مهم صفحه لرینی تنوره مدار اولاجینی جهته مذکور وثیقی بروجه آتی درج ایدیورز :

وقتا که اسکندریه واریله رق قرنتنه ایچون تخصیص اولنان قوناغه چیقیلوب دزت بش کون مصر طرفندن نه بر مکتوب ونه بر خبر ظهور ایتمه میش اولدوغندن بو صورت در سعادته آ کلاشیلان خواهشه مخالف کورنمکله باعث مطالعه اولمقده اولدینی حالدده لیب افندی داعیلری ظهور ایتمش و مومی الیهک مصردن مخصوص کوندرلشی البته مأموریت عاجزینک عجله آ کلاشیلمسی قصدی ایهده غالباً مومی الیهه تعلیم اولونمش اولدیغندن کویا اسکندریه و وصول چا کرانه می ایشیتدیکله مصرده طور میوب کلش اولدینی مقدمه ایدرک مأموریت بندکانه می آ کلامق ایستیوب چونکه قرنتنه محلدده تقرب و کیزلی لقردی ممکن اولامیه رق بر ایوجه لقردی یه کیریشله میوب فقط کندوسنک لسان و حال و قالندن و طاتلی طاتلی طوغره یوب مصلحتی غایت سهولتی کویسترمسندن یازدینی مکتوب بی اساس کی منظم اولمش و هر نه ایه طرف کمتزیدن کندویه قطعاً رنک ویرلیه رک یالکز طرف حضرت قبودانیدن یازمش اولان شقه اعطا ایله اکتفا اولنش وایکی کون اسکندریهده اکلنوب یه مصره عودت ایله مشدر مدت مدیده مومی الیهه اثنای مصاحبتده قرنتنه مدتک امتدادندن و عبد کینه

لرینک بورالده اکنمکه مأموریت عاجزانه مک مساعده سی اولیوب بر آن اول
پاشا حضرت تریله ملاقات آرزو اولنمده اولدوغندن طولانی بعضی لقردی کچمش اولمق
حسیله مصره وارد یقنده بونلری سولیبوب بوماده نی وسیله ایله یعنی قرنتنه خصوصنده
کندولری معذور اولوب مداخله ایده مدکرندن ملاقات بر آرز اوزایه جق ایسه ده بر
کون کبی کلیه جکی بیان واعتذار ایله مصر والیسی حضرت لرینک بر قطعه شقه سی
کلش وبومامله دن دخی برشی آ کلاشیلاماش اولوب هر نه ایسه قرنتنه مدتی دخی
رهین ختام اولمغه مهماندار اولارق ورودایدن قوجیلر کتخداسی احمد آغامرافقیله
قانه لره رکوباً مصره عزیمت اولنمشدر اسکندریه دن حرکت اولندیغنک بشنجی
کونی مصره موصلت اولنوب مورهللی شیخ نجیب زاده باش معاون سامی بکک
قوناغنه مسافر ویرلش اولدیغمدن ساعت طقوز صولرنده قوناغنه وارلدقه رمضان
شریف اولدیغندمیدر یوخسه مخصوصنی بکلمشدر مومی الیه قوناغده بولمغه آشنالق ایدر
ایتمز مأموریت عاجزانه می سؤاله باشلامشدر مومی الیهک درجه شیطتی در سعادته
متواتر اولمغه قولاق طولفونلنی اوله رق اسکندریه ده کرک لیب افندیکنک افاده سندن
وسائر تحقیقاتدن وکرک مصره وارنجه قدر مهماندار وسائر مأمورلردن استماع
واستطلاع اولونان کیفیاتدن میر مومی الیهک مصرجه درجه نه ایسه ده نفوذ واستیلا سی
اولدینی معلوم عاجزی اولمش وچا کرلرینک کندوسنه مسافر ویرلمکلمکم مخصوص
وملتزم ایدوکی آ کلاشلمش وفی الحقیقه حال ومقالتدن دخی حقنده سویلنیلان
سوزلرک صاحبی اولدینی تین ایلش اولمغه هان مکرومکیدتندن جناب حقه صقنوب
جوابه تصدی ایله بنم مأموریم حامل اولدیغ مکتوب حضرت قبودانیده محرر اولمق
حسیله ویردیکنده مطالعه سندن معلوم اولور وصیام حالی ویول سر سملکی جهتتریله
لقردی اتمکه پک لیاقم یوقدر دیمش ایسه مده اطرافیه آ کلامنی التزام ایدرک درلو
زمینلره آراشیدر دیغندن مماشاة اولندقه بالکتر قبودان پاشا حضرت لرینک مکتوبیمیدر
باب عالیدن یاخود آخر محلدن تحریرات وشفاهاً سزه خفی بعض اراده وتنبیها ت یوقیدر
دیمکه چونکه لیب افندیکنک مکتوبی مشارالیه قبودان پاشا حضرت تریینه کلش
ومنظور مکارم موفور حضرت شاهانه بیوریله رق جوابی دخی با اراده سنیه مشارالیه
حضرت لری طرفه یازلمشدر ودر سعادته بوماده خفی طوتیلوب آخره شایعه ویرلماش
اولدیغندن کتوردیکم مکتوبده بو طرفده دخی مکتوم طوتلمسی اشعار بیورلمشدر

وحل وعقده مأموریت مستقلم اولماق حسیله شفاهاً و تحریراً تنبیات و تعلیمات
 وقوعبولماشدر دیدیکمه سزه نه حاجت ایدی اومکتوبی بر تانار دخی کتورردی
 البته مأموریتکز وارد سوئیورمز پاشا افدمز مراقایدن آنکچون سؤال ایدرم
 دیمکه صحیحاً اینجه اینجه مأموریتیم یوقدر فقط بومصر ماده سنه معلوماتم اولمقله بعض
 اسئله وقوعنده جوابلرینی ویرمه مآذونم دنیلش وبر آز اکلنوب قالقوب کیتش
 اولمقله اخشامه یارم ساعت قالارق کلوب افدمز سزی ایستردیه رک چا کرلرینی
 قلعده دیوان تعبیر ایتدکری محله کوتورمشدر پاشا افطاری حرمده ایدوب
 دعوت اولنان مسافرین دیوان اوطه سنده افطار ایتک اصولدن اولدیضدن چا کرلری
 ولیب افندی و میرمومی الیه ذکر اولنان اوطه ده افطار ایدوب اوطوررکن مشار الیه
 چیقوب قهوه ایچیلدکن صوکره حلوت اولوب مأموریت عاجزانه مدن سؤال ایتش
 وعبدعاجز لری دخی لیب افندینک شویله بر مکتوبی و طرف دولتکزدن قپوکتخداسی
 افندی به بویله بر شقه کلشیدی قپودان پاشا حضرتلری طرفندن تحریر بیوریلان
 جوابنامه ایله بنده کزی مأمور و ارسال بیوردیلر دیهرک مکتوب اعطا اولنش
 وسامی بکی چاغردوب موم طوتدیره رق قرائت ایله آکا ویردکن صوکره مجلس
 ینه تخلیه قیلنش ولونته نفیر کله رک بیاغی اظهار تبث ایله به جانم بویله شیر نیچون
 اوله یور بن احمد پاشا حضرتلری کلسون دیمدم بونصل اولمشدر سکا نقل ایدیم
 لیب افندی اسکندریه به کلدیکنده درعلیه دن حرکتی کونی ماین هایونه چاغریلوب
 خاکپای هایونه یوز سورمش والتفات سنیه به مظهر اولمش اولدیغنی وقپو یولداش لری به
 اتم تردد و مناسبتی کندوسی سویلش وفی الحقیقه التفات عالی کیفیتی دخی متعاقباً
 تقویم وقایع نسخه سنده کورلش وحق عاجزانه مده میل وتوجه عالی بی مبشر بعض
 مقالاتی دخی وقوعبولمش اولدیغندن هر نه قدر بویله لقر دیلره کیریشمی مأموراً
 اولدیغنه دائر کندوسندن صراحة کلام ایشیدلمه مش ایه ده سیاق وسباقدن ولسان
 حالندن مأموراً اولسی استدلال اولنش وبویله برسوزنه کیریشلمک بلاما مأموریت اولیوب
 البته کندوسنه امر و تنبیه بیورلش اولسنی اقتضا ایدم جکی ملاحظه قیلنش
 اولدیغنه مبنی واقعا طرفندن دخی اظهار خلوص عبودیت اولنوب یعنی صمیمی
 عفو عالی به مظهر اولسم یا شم یتشه واردی کیدر مبارک خاکپای هایونه
 یوزیمی سورردم وحاضر بر طاقم عسکر وسفائن ایله بن واولاد و اخفادم دولت

وملتہ خدمت ایدردك كې كویئده اولان شیلری سویله دم کندوسی دخی ممنون اوله رق شوکت مآب افندمرك دخی بوندن عبارتدر عفو و مرحمتی غالب بر پادشاه دیشاندرلر بوصورتله خدمت و عبودیت ایتدکدنصکره عفو صمیمی به مظهر اوله جفگزده شبهه ایتیه سز احمد پاشا حضرتلری غالباً اقدکزه چقه جقدر دیو کلسه دعوت ایدرمیسز دیسیله های های قیو یولداشیله کوروشمکی کیم استمز جانمه منت دیدم او یله بر مکتوب یازوب کوندرمش وبوصورتده لیب افندینک مأموریتنده شبهه قالمش اولدوغندن دوغروسی پک ممنون اولمشیدم شیمدی سزك مأموزیتکزدن مایوس اولدم و لیب افندی او یله سپارش اولنوبده شیمدی باشقه قابله دوکلی پک کوچه کیتدی احمد پاشا حضرتلرینک گل سندن اکراهم یوقدر لکن کلسون دیو ارزو ایله مدم اشته لیب افندی بوراده چاغردهیم سؤال ایله هم سنک مأموریتکی کویا در سعادتده مکتوم طوتمش اولدقلرندن بوراده کتم اولنسنی اشعار ایده یورلر حالبوکه اشبو مکتوبك مالی بوکونلرده انکلتزده دن کلمش بر رسمی غزته ده صراحة یازلمشدر ترجمه سنی کوستریم بکا بویله یازوب انکلتزده لویه سویلك و بنی فرنکلرک لسانه دوشورمک روامیدر بنم نه قصورم وار دولت و ملت ایچون فنامی خدمت ایده یورم شویله بویله دیهرک اغزی قزیشوب پک چوق شیلر سویلمش اولمغله طرف چا کریدن دخی واقعا مصلحت ذهاب و افاده کز کبی اولسه حقکز واردر لاکن او یله دکدر بوراده لیب افندی ایله نوجهله صحبت اولندیغنی بیلیمورز کلان مکتوبدن آ کلاشیلان صورت نوجهله ایسه کتوردیکم جوابنامه اکا کوره یازلمشدر و لیب افندینک مأموریتی یوقدر و غزته حوادثی استانه سعادتدن چیقما یوب بورادن کتمش اولسی محتملدر دیدیکمده عظیم انفعال ایدوب اولاد سن زوقاقده اوینارکن بن بویوللری بیلورم شیمدی سنده محمد علی بی الداتقمی ایسترسن دیدیکنده چا کر کینه لرینه بو معاملات کران کله رک بی اختیار دائره ادبی تجاوز ایله بنده کز زوقاقده اوینامدم اون بش یاشمده باب عالی به ملازمت ایدوب نادرالوجود ذوات کرام حضراتی معیتلرنده بولنه رق سایه حضرت شاهانده او یله جه استخدام و تربیه اولدم سزی الداتمه دخی مجبوریت یوقدر واقعا دائما تحریدن خالی اولمادیغکزدن اکثر وقوعاتدن خبردار ایسه کزده هپی حقیقی اوزره خبر آله جغنی اعتراف ایتیم هله مأموریت عاجزانه مک اغیاره خبر

ویریلسنی عقل دخی تجویز ایتمز بو طرفدن ترشح ایتمدیکنده شبهه یوقدرکه در سعادتن حرکت ائناسنده قولونل روحل اسکندریه ده احمد پاشا حضر تیرینه انتظار اولنه یور دیو یازمش اولدیغنی سفارت طرفندن باب عالی یه افاده اولندقدہ ایشتمشیدم او یله ایکن ینه کتم اولندی بر دلیلده شودرکه چونکه استانہ علیہ دن لوندرہ یه بر آی دن اول خبر کیتمز اورایه خبر کیدوب طبع ونشر اولنہ رق بورایه کلمسی لا آقل ایکی آیه محتاجدر حالبوکه بنده کز حرکت ایده لی هنوز ایکی آی اولدی البتہ بو حوادث بورادن جقدی دیدیکمده جواب بوله میوب بن کیمسہ یه سویله مدم حالا قونسلوسلر هر کیجه کلوب سنک مأموریتکی خبر الموق ایسته یورلر سده کتم ایده یورم دیوب انکلترة قونسلوسی دخی صوررمی دیدیکمده هپسندن زیاده اوچبالار دیمکله چونکه در علیہ ده ایلچیسنه سویلنمش کرکدیکی ایلچی قونسلوسه دخی بیلدرملی ایدی دینلہ رک بتون بتون مغالطہ سی میدانه چیقار یلدقد نصکره بونلر کوجنه جک شیلر دکل مراد دولتکز لیب افندی یه افاده بیوریلدیغنی وجهله استحصال توجهات عالی اولدیغنی حالده لیب افندی نیک بر مکتوبیله بنده کزک مأموریتمه مساعدہ بیورلنندن طولایي تشکر اولتمق ایجاب ایدر یوخسه طلب طرفزدن اولمش کبی ا کلاشیلمش دیو تأسف اقتضا ایتمز ظن ایدرم دینلر کده پک کوزل او یله اولسون بن نه دیسه یم سنده مأموریت وارسه سویله دیمکله طرف چا کریدن بنده کزک مأموریتم انجق ذات دولترینک قبودان پاشا حضر تیریلہ ملاقات ایتملرندن مقصود و مرادنه اولدیغنی ا کلامق ونوجهله جواب تحریر بیوریلورسه الوب کوتورمکدن عبارتدر ارتق نه یایمق ایجاب ایده جکی مطالعه بیوریلیر ان شاء الله ینه کلورم دینلہ رک قوناغه عودت اولنمشدر ایرتسی کون لیب افندی کلوب کیفیتک ابتدا وانتهاسی کندوسندن لدی السوال واقع اولان افاده سنه کوره مومی الیه سایه حضرت شاهانه ده کندوسنک مرغوب ومقبول اولدیغنی ا کلامق مقصدیله معرض فخر ومباهاتده بعض لقردی سویله مش ومومی الیهک بومقالاتی انلرک ذهاب وقورندیلرینه موافق کلہ رک مصلحتہ کیریشلمش و صورت رضاجویي ومطاوعدہ کورینہ رک الله عفو صمیمی یه مظهر بیورلسون بزمدہ جبالادیغمز شوکتلو افندمز وملت اسلامیه ایچوندر ایشته مصرفسز شوکت مآب افندی مرک بوراده یوز یوز الی بیک قره عسکری ومکمل بر دوتماسی دائما حضر اولارق لله الحمد سایه شاهانه ده دینمز یوق وموجود خیلی اچمه مز واردر هر زمان

هر نوجهله امر و فرمان بيورلسه حياتده اولدقجه بن بعده اولاد واخفام
 خدمتده اولسون امل و افكاريمز بوندن عبارت ايسه ده و صلتك يولنى بوله ميورزكي
 محمدعلى پاشا و سامى بك كندوسنه چوق سوزلر سويلش اولدقلرندن اعتماد ايدوب
 و كندوسى مصلحتك ايچ يوزينه واقف اولماق حسييله بوضورت كندوسنه كوزل
 كورينوب مجرد كمال خلوص و غيرتى اقتضاسنجه خدمتده بولمق امليله جسارت
 ايدوب شوكتما ب افنديمز حضرتلرينك مراد هايونلرى دخى تحصيل قوت ايله
 ملت اسلاميه نك اسايش و استراحتى قضيه سنه منحصر اولمقله سرك بونيت و امنيه ده
 اولديغكيز معلوم عالى بيورلسه مطلوبكيز رهين مساعده بيوريلور ديهرك معهود
 مكتوبك يازلسنه قرار و يرلمش اولديغندن شيمدى مأموريت چا كريدن قورنديلرينه
 موافق اماره مساعده اكلامدقلرندن تلاشه دوشمشلردر بچاره ليب افندى
 مرادلرى نه اولديغنى اكلا دينى كې لساتى دكشديروب يوزلرينه قارشو سويله مديكى
 سوز قالمبوب حتى سامى بكه بن سزى مسلمانسكيز ديهرك سوزلريكيزه اينانيوب
 لله الحمد نزد سلطنت سنيه ده قدر و اعتبارم اولديغندن بويله بر نازك مصلحتى قلمه
 المغه جسارت ايلدم بن مى طالب اولدم يوخسه سرك تشويقكيزله مى اولدى سنك
 پاشاك بوقدر دولت و ثروتى قواله دنمى كتوردى هپسى سايه حضرت شاهانه ده دكلى
 ربم طاقكيزله سزى قهر ايدر شيمدى يه قدر بيلميهرك دعا كزده اولمش ايسه مده
 ان شاه دامن كهبيه ياپيشوب قهرىكيزى تمنى ايدم جكم ديهرك سويلنوب آرتق اولكى
 كې يانلرينه دخى وارميهرق اسواق و بازارده علناً فصل و مذمت ايتمش و چا كر
 كمينه لرينك عودتمدن درت كون اول حجازه عزيمت ايلشدر مومى اليه ليب افندينك بونلرك
 يالكز مصلحنه دائر سوزلرينه دكل مسلمانلقلرينه دخى آلدانديغنه تأسف ايتمى فى الحقيقه
 بجادر زيرا بونلر كوچوك و بيوك جمله سى قدر الهى و اراده الهيه يى منكر و فرائض
 و سنتى عبته ايله اشتغال ديهرك كلياً تارك اولوب اعتقاد فاسدلرى جناب حق جهانى
 خلق و تكوين بيوردقن صكره اراده سنى مخلوقاتندن نوع انسانه حواله بيورمش
 اولمقله هر قننى صنف و ملتدن اعقل آدملى ظهور ايدر ايسه حسن اداره آنلرك
 النده در زعمنده اولدقلرينى و كندولرينى اعقل ناس عدايله كلىرينه مبنى بالا پروازلقلرى
 تعريفه كلز پاشا ايله ملاقاتمز عرفه كيجه سى اولمش اولديغندن ايرتسى كون كيدليبوب
 بيرام كونى كيدلمش ايسه ده رسمى اولديغندن غلبه لكدن لاقردى يه ميدان اولماش

اولقله بایرامک اوچنچی کونی ینه کیدلدکده اولکی طوری دکیشوب بتون بتون میدانده کی پرده نك رفع اوله مامسی فرنکلرک حيله وصنیعه لرندن اولدینی وکندوسنک قوت بریه و بحریه سی شوپله و حسن اداره سی جهتیله قوت مالیه سی بویله اولوب بالفرض اسکندریه مدت مدیده محاصره اولسه خارجدن برشیته محتاج اولیه رق شمیدیکی کی اداره سی و بلکه فضله محصولاتک ینه آخره فروختیله بوحالده آچه ادخاری ممکن اوله جفندن سلطنت سنییه تقریبی ایستمدکلرینی و عسکرک الیسه سی شوپله یاپیلور و فابریقه لرده مهمات بویله اعمال اولنور دیهرک بر ایکی ساعت ضماً کندوسنک اصحاب قوتدن بولندیغنی آکلاده جغم دیو اوغراشمش ایسه ده طرف چا کریدن یالکز استماع ایله اکتفا اولنه رق قوناغه عودت اولنمشدر وصول عاجزانه مدن صوکره هر نه قدر لیب افندیکنک مأموریتی اولدیغنی آکلامشدر ایسه ده اعتراف ایتیب ینه او صورتده یعنی خواهش آستانه سعادت طرفندن وقوعبولش حکمنده طوته رق اوله کور نمکده و چا کر کینه لرینک مأموریت عاجزانه کوروب ایشتدیکی عودتده افاده ایتمکدن عبارت اولدیغندن کآن مصرک قوت و مکنتی بیلدیمرک فکرنده اولدقلرندن دائماً سامی بک بووادیلرده کزنمکده اولدینی مثللو ذکر اولنان ملاقاتده پاشا دخی بتون بتون مجلسی بو ضرورته حصر ایتش اولسی جهتیله بر آرز آغر طور انمق مناسب کی خاطر عاجزی به کلش و بحکمة الله اوچ کون قدر بر صداع دخی عارض اولسبله بالطبع پاشایه کیتمک دکل سامی بکله بیله لقردی به کیریشلمه مش اولدیغندن بو حالی انجیندیگمه حل ایله اولکی معاملات بارده ملایمه تحویل اولنش و سامی بک بر قاچ کوندر افندی بی کور میدیکز دیمش اولقله آنلرده بی ارادقلری یوقیا کوروب نه یاپه جغم کچن کون کیتدم ایکی ساعت فخریه ایله وقت کچوردیلر بیلیم مرادلری نه ایدی بن کوروب ایشتدیکی تبلیغه مأمور ایسه مده قیودان پاشا حضرتلریله ملاقات جویلقدن طولایی اولان افاده لرینی آکلامقدر یوخسه مصرک کیفیتنی تحری به کلدیم زحمت چکدیلر جوغی بنده کزک خاطر مده قالمامشدر بونی بیلدیمرک بر معنایه شامل اولوب مرادلری او ایسه بو تکلف قوللانیلان لسان عبودیتی مکذبدر یوللو کویا میرمومی الیه طرف کلفت اولنش اولدیغندن لاابالیانه بعض سوزلر سویله دیکمه افندمک سزی جاغرماملری خواهش آکلامیه سیکز دیودر بو خسه هرکون کورمکی ایستر و دائماً عقل و فکری رؤیت مصالحه

مصرف اولدیغندن سزکله ده او لقردیلری ایتشدیر یوخسه بشقه معناسی یوقدر بونک طریق اسلمی اشته ایکیمز کده مصلحتده اتحاد خلوصمز واردر بینمزمده لقردی ایده لم برآورته سنی بولور بعد افندمزه افاده ایدرز دیوب بنم سوزم یوقدر صمیمی عفو و توجه عالییه مظهریت مرادلری اولدیفنی حالده شوکتآب افندمزی خشنود ایده جک بر صورت اجرا ایدرلر دینلکده بونک اوزرینه چوق سوزلر طولاشدیروب عجا شویله می اولسه بویله می یاپلسه یعنی خاکای عالییه لایق بعض شی تقدیم اولسه وبر شام واردات معینه سینه بر آرز ضم قلنسه و سفن مصریه لدی الایجاب دونمای هایون معینده اولسه وعسا کر بریه لازم اولدقده ویرلسه یوللو بر طاقم مطالعه لرینی کائن کندولکنندن حسب حال وادیسنده بیان وچا کر کینه لرینی ایناندر مق ایچون بنم هر بر شیئه عظم ایرر بوکتدی کمز یول چیقماز اما نه یاپیم بولندم چونکه بونلر اوچوز کیسه قدر آچه ویررک فاملیامله اسیرلکدن خلاص ایتدیلر آنکچون خدمت ایدرم دیررک صورت محرومیت اظهار ایتمش اولدیغندن عبد عاجز لری دخی کویا اعتماد ایتمشجه سینه البته درایت و فطانتکز واردر چیقماز یول اولدیغنی بیلور سز خدمت ضایع اولمز سز انصافچه حرکت ایدرسکز حقکزمده کوزل اولور یوللو حسب حال ایله استکشاف مافی الضمیر ایچون آرتق سزکله بینمزمده هر بر لقردی نی ایده بیلور سز شوکتآب افندمز حضرتلرینک استحصال رضای علیه لری حقنده مطالعاتکز کافی اولمدیغنی سزده بیلور سز بنم خطر مهده کلور که چونکه پاشا حضرتلری عفونی طلب ایلدیکی قباحتی عکا والیسنه طارغلقندن ایتمش ایدی شمدی طارغلق قللدی لایق اولان کافی السابق مصره قناعت و بوقدر مصرف تکلفه محتاج اولمقدن اقالیم مصریه نک و حجازک اداره سینه کافی عسکر و بر قاچ کمی آلیقیوب یعنی هیئت اولیسنه عودت ایلسه احتمال که خشنودیت حاصل اوله رق عفو و توجه عالی ارزان بیوریلور دیدیکمه صقنوب بونی افندمزه سویله میه سز پک کوچونه کیدر و آپ آیوجه امنیت کلمش ایکن یکیدن اور کر دیمکه سزک مطالعه کزه قارشولق اوله رق خاطر مه کلنی سویلدم انلرده بویله لقردی اچسهر مطالعه م اولق اوزره سویلرم فقط مأموریتیم اولمدیغندن بویله سوزلری ابتدا سویله م سوال واقع اولور ایسه جوانی ویریم دیدیکمه افندمز بو سزک دیدیککزه چوق جواب بولور بنم مطالعه لرم مصلحته یقیندر لکن اولکی عفور

کبی لفظی اولور ایسه ینه امنیت ایده من و کندسی بعده فاملیاسی امین و مستریح
اوله حق صورتده احسان عالی به مشروطدر دیمکه شرط صاحب عفو طرفندن اولمق
لازمکلور و احسان مظهر عفو اولدقدن صکره امیدارلور سزک لسانکزی
بیلیمورم دهرک ایما ایلدیکی توارث صورتی کلاشلماش وادیسنده صاوشدرلمشدر
ایرتسی کون پاشا شوبرا بغچه سنه کیدوب حنطو ارسالیه چا کر کینه لرینه ایستمش
اولدیغندن کیدیلوب اوچ درت ساعت مصاحبت اولمغله خاکای هایون حضرت شاهانه به
عرض خلوص عبودیت واولکی ایتدیکی شیر بعض طرفک کندوی کوجندرملرندن
ضروری وقوعبولمش اولدیغندن طولای اظهور ندامت ایدرک شمدی امل مخصوص آخر
وقتده خاکای هایون حضرت شاهانه به یوز سوروب و اراده بیوریلورسه اکثر وقت
بوغاز ایچنده اقامتله حصه سنه دوشن خدمتی عقلی ایردیکی مرتبه ده و مالا و بدنا
ایفا ایلمکدن عبارت اولدیغنی و کندوسنک طرف سلطنت سنیه دن بیکانه طوتملسندن
طولای فرنگکر ممنون اوله رق سعی و غیرتلی بتون بتون ایرمق اولوب و بوايه
معاذالله ملتک پایمال اولسنه سبب اوله جفندن بو باده حیرته قالمش ایدوکنی بیان
برله شمدی آستانه علیه ده هر بر شی یولنه کیرمکه باشلامش اولمغله ال برلکیله
چالیشلسه و مصرک عسکر و سفائی دخی عسا کر منصوره و ترسانه معموره الهاق
اولنسه دول اربعه دن هیچ بریسی دولتعلیه اوزرینه جسارت ایده من و شمدیکی
تکلیفاتک برینی ایلیمزلر بو حال ایله غیرت اولدیغنی صورتده اون سنه ظرفنده
دولت علیه قوت جدید حاصل ایدر و ربم عمرلر ویرسین ولی نعمت افندمزاجداد
عظاملرینک ممتاز اولدقلری مثللو جمله حکمدارانک ملجائی اولورلر دیمکه ربم توکنمز
عمر و عاقبت احسان بیورسون شوکتیاب افندمز حضر تلرینک لیل و نهار همت عالی مرتبت
شاهانه لری دولت علیه لرینک تکشیر قوت و بقای شان شوکتته مصروف اولمغله ذات
دولتلی دخی اراده بیوریلان خدمتی ایفایه غیرت بیوردقلری حالده بیکانه لک طبیعی
برطرف اولمش اولور دینلده یوق اولاد سامی بکه بعض لقردی ایتمشسز
بکا کوچ کلدی دولت علیه نک و شوکتیاب افندمزک وزیر ی بنم کبی اولمی
وزرانک کثرتیه نه اولور ولی نعمت افندمز نوقت امر بیورسهر یوز بیک
عسکرله اوغلیمی اراده بیوریلان محله کوندیرم و بن اختیار ادم اولدیغندن سفاین
مصریه به بزمامور اولدیغم حالده خصمه جواب ویرم قولم قنادم قیرلقدده نه ایش

كوره يلورم ولى نعمت افندىز احسان بيوروب عهدمه بولنان يرلى ترك تكليفندن
 بوشرطله تقرير بيورسونلر واولاد و اخفادىدن دخى ايش مأمول اولنورسه انلرده
 احسان بيوريله جنى وعد بيورلسون اما امنيت اولنر ايسه يالكز بوديديكم خدمتلر
 ذكل سائر هر نه درلو خدمات تكليف بيوريلور ايسه شرط درج اولنهرق بتون اوروپايه
 وجميع عالمه نشر اولنسون بندن و صكره اولاد و اخفادىدن خلاف برشى ظهور
 ايدرايسه لغو اولسون يوخسه اوتوز سنه در جبالوب ميدانه كلش قوتى بوزمق بكا
 كوره دولتمه و ملتبه خيانت كلور كچنده نيمچه قونسلسوى قوت بريه و بحريه كرك
 تقليلى تكليف اولنهرق ايش ديو سويلديكنده قيو يولداشلم بكا بوتكلىنى ايتزلر
 ديمش ايدم مكر صحيح ايش ايشته تكليف ايدم يور سوزو فضله اولهرق برية الشامك
 تركنى دخى سويلش سز بندن رابطه لو اداره ايدم جك قنى وزيره توجه بيوريله جق در
 دها كوزل اداره سنى عقم كسر سه ترك ايدرم ديمكه چونكه بنده يه كوره اقتضا
 ايدن رضا جويلى اولديغندن توجهات خصوصنده بحث اولماق كر كدر واقعا سزجه
 چوق نما حاصل اولمق و عسكر تحرير اولنمق جهتلىله اولكى حاله نظراً حسن اداره
 عداولته يور لكن زياده جه تعدى اولندقلرى ايشيدىلكنده در و فريادنامه لرى كلكده در
 بونلرايسه ظل الله فى العالم و خليفه نبي محترم شوكتما ب افندىز حضرتلرينه وديعه
 اولنديغندن آسايش حاللىك استحصالى لازمه ذمت همت ملكداريدر ديدىكمده
 سائر محالرده ملتزم و ويوده لك ايتدكلرى دها مى ايدور ديمكه اونلرك ايتدكلرى
 برشى ديمك دكل ايكن رجم وجود هايونلرينه عافيت و يرسون انلريده قالديردى
 ديدىكمه آمان نجه اولدى سويله بقلم ديو ب التزاماتك مشيران كرام حضرتانه حواله
 بيورلديغنى و صورت و كيفيتنى و آنك اوزرينه ويريلن تعليماتك و شرفسنوح بيوريلان
 مبارك خط هايون شاهانه مضامين منيفه سنى تفصيلاً حكايه ايلديكمده مكر مشيرلك
 ترتيبنى يالكز رديف تحريرندن عبارت بيلوب اداره ملكيه و ماليه مسئله سنى بيلمز
 ايش بيلم صحيح بيلم جعلى غايت منبسط اولوب ايشته بوكا ديه جك يوق بك
 كوزل اولمش ديوعودتمه قدر هر كون آجوب ممنونيتنى اظهار ايتمشدر بعده صدد اوله
 عودت ايله بنم عهدمه بولنان يرلرده كيمسه تعدى ايدم سز و خبرم اولمقسزىن برايش
 كورولز زيرا ژورنال واردر هر طرفدن خبر آلورم ديمكه ژورنال اصولى
 سايه حضرت شاهانه ده ممالك محروسه نك هر بر محله وضع و اجرا اولمش

اولمغله واقعا کوزل شی ایسهده پکده حقیقیله خبر ویرلرمی بيلم دیدیکمه
ینه فائدهدن خالی دکدر بی تبشیر ایده یورسون اشته بوندن دخی خبرم یوغیدی
پکمنون اولدم دیوب کچنلرده بریهالشام طرفندن وقوعبولان اختلال کثرت تعدیدن
واحدات اولنان بدعتلردن وعسکر النسندن نشئت ایلهدی دیو ایشیدلمش ایدی
دنیلدکده عسکرالنمی کوچلرینه کیتمش واولیه برشی ظهور ایتمش ایسهده سلاحرلی
دوشیریلوب مندفع اولمشدر وشمیدی اونلر دخی مصر کبی زراعتیه سوق اولنملریله
پکچوق شی حاصل اوله جقدر بو بزم ملت تنبل اولور کسندولکلرندن چالیشمز
چالشدیرملیدر اول ایشیدردم آیدین وحوالیسندن ازمیره سنوی یوزمکسان یوز
طقسان بیک بالیه پنبه اینرمش شمدی اون بیک بالیه تنزل ایتمشدر بونلر دقت
ایده جک شیردر دیدیکنده واقعا اناطولیده لزومی قدر اگر بجزلر لکن کلرکن
کویلری کوردیم غالباً بو عربلرده آچه ادخارینه مجبورلر زیرا خانهلری طبراقدن
واچینده حصر واورتی کبی برشیلری یوق کیدکلری برکوملک یدکلری مرجک
جالبوکه لیل ونهار چالیشه یور وسنهده اوج درت دفعه محصول قالدیره یورلر
وحیوانلری ییلده ایکی کره وایکیشر اوجر دانه طوغره یور ارتق بونلر پک زنکین
اولمی دیهرک معرض لطیفهده تعدیات صریحه سی ایما اولندقدہ اکلاما مقلغه اوره رق
آچه بی طبراغه کومرلر حتی کچنده کویده برشیخ اولدی بیک کیسه آچه سی جقدی
دیوب ینه اولکی صده عودتله وای اولاد بر شام اختلالی بکا بر قباحیت ایتدیردی
اندن متهم ، رشید پاشا مرحومک تحریکیله اولدیفنی خبر ویردکلرنده کوجه کیدوب
انکلتروه یه استقلال ایچون مراجعت ایتمشیدیم یکر می کون کچدی ندامت کلدی
حالا کندمه لوم ایدرم ومحرم ادملرمی منع ایتدکلر یچون خاطر مه کلدکجه تکدیرایلرم
دیمکه بز اختلالی دیمین دیدیکم سبیلردن ظهور ایتدی دیو ایشتدک صحیح رشید
پاشا مرحوم طرفندن اولسه بیله اجنبیه مراجعت تجویز بیور ماملری لازم کلوردی
غالباً زیاده جه کوجنمشسکز دینلوب واقعا اولیه ایدی لکن در سعادتده بنم علیهمه
دائماً مراجعت اولنه یور ومخصوص سفرا کوندریلوب بومصر بحی اوروپاده سوریله یور
بونلردن فائده اولماز بودفعه فرانسه ایلچیزی کیدرکن محرمانه لقر دیلر اولمش ونطق
هایون اوله رق بر کاغد دخی ویریش بوراده کی قونسلوسی دخی جلب ایتدیلر
بقه لم نه یارلر بنم مسئوله مساعدده بیورلسه انلر قارشیدرلمسه البته کوزل دیمکه

یوق افندم بو قیوی سزاجدیکنز درسعادته سفارتلره مراجعت اولندیغی یوقدر بلکه بو طرفله محاربه لرندن طولانی واقع اولان سؤاللرینه مناسب جواب ویرلمکده در امیرال روش دخی سزک بعض محللری ترک ایتک اوزره عفو صمیمی به مظهریتکیزک استحصالی ضمننده کندولره مراجعتکزی خبر ویرمش و غالباً بوبابده اراده علیه یی استفسار ایتمش اولمسیله جواب ویریلدی ظن ایدرم دیدیکمه ایمان غلاظ ایله بن فرانسه لویه قطعا مراجعت ایتدم و باب عالی به تقریر ویرمش دیو ایشتم اصلاخبرم یوقدر بنم بیلدیکم پارسه کیدر اولدیغندن کندیسنه مراجعت اولونمش وتعلیات ویریشدر ویا لکز مصرک اولاد و اخفاده انتقاله مساعدۀ عالی بیوریه جقمش دیورلر دنیلکده اشته بومساعدنه لقردیسی صرف یلاندر دنیلوب اخشام نقرب ایتمکه عودت اولونمشدر ایرتسی کون سامی بک قوناقدۀ دون افندمزله بینکزده جوق مباحثه لر کچمش بر آزیخی نقل ایتدی کرکی کچی یوله یاتمش مصلحتی کیرو براقیه رق همان بوراده تسویه ایله سکر کوزل اولور دهرک لقردی به کیریشوب یوله یاتمش بومیدر کندولر سویلیوب بن دکله دم بوندن نه چیقار چونکه بنم مأموریتک مساعی اولدیغندن متمم مصلحت اوله مم لکن یوله یاتمش اولسه لر ایلروده حس تسویه سنی مأمول ایدرم بو حال ایله امیدم منقطعدر دیدیکمه بو آدمک فرنکلره آراسی پک اویغوندر آنلرک واسطه سیله اولمسی استیمور یوقسه مصلحتتیر و بر آز دخی کشا کشته قالورسه یدی سنه ختامنده آرتق اصول اوروپا اوزره کوریه جکدر دیمکه فرنکلرک سزه مجبوریتلرینک وسلطنت سیه دن زیاده سزه حرمت ورعایت ایده جکلرینک سببنی بوله مم یدی سنه اصولی معتبر اولق لازمکله نصیحت دکله مدیککز ایچون سزه مضرب اولسه کرکدر سزک ایچون جمله ناس مغایر حقانیت ایش کوررلرمی مأمول ایدرسز مصرک شو اصول اسایشی سلطنت سیه سایه سنده در از جمله فرنکلرک پک صقشدیردقلری ماده ده دولتمزدن امر اولدقجه یاپه میز دیوب خلاص اوله یورسز بونی انکاره محل وارمیدر دیدیکمه جناب حق اوزرمزدن اکسک ایتسون بتدخی بواعتقادده یم نه چاره قورندی بشقه صورتده اولدیغندن حس تسویه سنی ازدرون استرم دیمکه پاشاحضر تلرینک امین ومستشاریسکر کوزلجه اکلاده سزکه صکره مکافاتنه مظهر اولورسز دنیلوب کیتشدر محمدعلی پاشامصر جوارنده دوبار اتعیر اولونان باغچه لکده کائن ابراهیم پاشا

قصرینه کیتمش اولدیغندن چا کر کینه لرینی اورایه چاغیرتمش اولمغه کیدیلوب ملاقات اولونمش و بعد عاجزک دخی مصرده مدت اقامتم اون کونی تجاوز ایتمش اولدیغنه و کیفیت حال دخی آکلاشلمش ایدو کنه مبنی رخصت دولتکز اولور ایسه برایکی کونه قدر کتمک استیورم زیرا حسابده دکزده بو قدر ا کلنمک و قرنتنه بکلنمک اولدیغندن شمديه قدر در علیه ده بولنه جق ایدم سایه حضرت شاهانه ده مامور اولدیغم مصلحتلرک یاننده بولنمقلمی استرم دیدیکمه پک آز اولور اما قبودان پاشا اوغلم دخی چابق اعاده کزی اشعار ایتمش اولدقلرندن ربم سلامت ویرسون برایکی کون ظرفنده چقاریرم کریدلقر دیسی مقدم بر قاج کره سامی بکله کچمش اولدیغندن برابر کزده کریده دائر دفترلر وارایمش دیرسکزرکه بودفعه کریددن جلب اولونان دفترله مقابله اولنسون کرچه بن مصر و بر شام وارداتنک کذران ایدن ایکی تقسیطیله اصحاب علاقه نک آقچه لری و کرید ایچون علی الحساب اوله رق یکر می بشیک کیسه لک پولیجه ترتیب ایتدیردم سندن اول آستانه علیه وارر بقلم دفترلر مقابله سندن صکره کرید ایچون دهانه ویریلک لازم کلیرسه حلول ایدن بر تقسیطیله برابر ورا کزدن ایریشدیریرم بو تقسیطلرک هنوز یولنه کیره مامسی بعض اشتر اولنان اشیدان طولای آوروپالویه اولان دیندن اقتضا ایتمکه شمده آزالوب فقط ایکوز الی بیک فرانسه مقداری بورجم قالمغه بوسنه آردی آلدقده تقسیطلری وقت وزمانلرندن اول در سعادته صرافه یاتیریرم و قتلری حلونده آالنور و سهولتی اولور دیمکه دفترلر برابر اولدیغندن طاقیله اخراج واعطا اوله رق بو کریدک توجهنه دائر امور ملکیه ناظری پرتو پاشا حضرتلریله مقدا مذا کره کزده غالباً بدائی سنه سی آلتی بیک کیسه ویرلک و صکره لری تحمکنه کوره ضم ایله اون بیک کیسه یه ابلاغ اولونمق و ایلروده ده قباردلق کبی لقر دیلر کچمش ایدی حالا معینات قدیمه سی بیله رابطه بوله مدی دینلده واقعا او یله لقردی ایتشیدک صکره مأمولم کبی جیقمنادی حالا مصرفی چقارمدم شمیدلرده یولنه کیرمکه باشلادی ینه اولور یالکز بوکا دکل کچنده سویلدیکم کبی صمیمی بنده لک دفترینه سائر قبو یولداشلمک صره سنه قید بیوریلور ایسه عهدمه اولان محللر وارداتنک جمله سنه ضم ایدرم دیمکه اول دفتر جلیله ده مقید اولدیغکزده شبهه کز اولسون هان لوازم بنده کی و عبودیتک اجراسنه همت بیورسکز جمله بندکانه اک بیوک قبو

يولداشى اولورسكز وهر وجهله كوزل اولور يوللو تا مينا ته داثر بهض سوزلر
 سويلندكده بنم اميدمه اوله در لکن ايتدكلم چوقدر امنيت گلز امين اولق
 استرم واولاد واخفادمك دخی بدن صكره خدمات سلطنت سنیه ده بولنه رق
 سایه شاهانه ده نامك بقاسنى آرزو ايلرم خا کپای هایون ملوكانه یه یوز سورمك
 املدر نه یوزله كیده جکمی ملاحظه ایدرم دیمکه ربم تعالی حضرتلری توکنمز عمر
 وشوکت احسان بیورسون شوکت مآب افندمز عفو ومرتحتی غالب بر پادشاه
 طایشاندرکه مثلی جهان کلامشدر انشاه کیدوب مبارک خا کپای هایون شاهانه لرینه
 یوز سوردیککزده آکلارسکز وبوعنایتده اولان لذتی هر برشیته ترجیح بیوروب
 شمیدی به قدر وقتکزی ضایع ایلدیککزه چوق پشیان اولورسز دیدیکمه
 انشاه بواملم حاصل اولینجه اه جائمی آلمسون دیمکه بوسزك یددولتکزده کیدر
 سبی بیوردیفکزه جناب حق دخی تقدیر ایلر دنیلوب بولر تکلیف ایدیه یورسز
 بولرله امین اوله مم دیمکه تکلیف اولنان شیلری مطالعهم اوله رق سويلدم مثلاً مصره
 قناعت بیورمدیفکز حالده دیکرلرینك کندولکزدن ترکیله برابر عکالك عهده کزده
 ابقاسنى رجا بیورسکز بلکه مساعده بیوریلور دنیلدکده واللهی رضامله برکویک
 ترکنى پیام مجبور اولورسم او بشقه سکا طوغریجه سى امنیتك حصولی عهده ده
 اولان یرلرک الی الوفات ابقاسیله وبعده اولاد واخفاده احسان بیوریه جفته وعدعالی
 ارزان بیورلمسیله ممکن اولور آندن صكره بقیه عمریمی تحصیل رضای عالی به وخدمات
 سلطنت سنیه به صرف ومال واملاکمی اغور حضرت شاهانه به بذل ایدرم قوت
 مصریه نك اولوقت تقلیلنه حاجت قالمز مصرفسزجه شوکت مآب افندمز کدر اراده لری
 وجهله قوللانورلر دیمکه بوبیوردیفکز صورتك ممکن اوله جفنى عقلم کسمز و هم
 آرتق بنده کزی بوبحثك مجاوبه سندن عفو بیورون زیرا مصلحت بنده کزك حوصله
 استعداد و مأموریتك تحمل ایدیه جکی صورتده تراکت کسب ایتمش اولمغه بولقر دیلری
 ایشتماش اولمقلم حقمده ومصلحتجه خیرلوردر دهرک قیادلقده بونده برکچمش یوقیا
 نیازمه مساعده بیوریلور ایسه فها اولمدینى حالده بن شمیدیکی حالده ممنون ومتشکرم
 ینه دعاده قصورم یوقدر فقط قورقدیغم فرنکلرک قارشمسیدر لکن بو حال ایله
 قاریشه جقلم و ایلروسی فنا اولاجق زیرا سن کله لی قونسلوسلر هرکیجه کلوب
 مأموریتکی آکلامق استرلر هر نقدر کتم ایتمش ایسه مده چاره سز بهضیسنه خفیفجه

سویلمکه مجبور اولدم بونلر بویله در اسلام ایچون چبالامزلر کندو چیقارلرینه سعی ایدرلر آرتق قدر نه ایسه او یله اولور سن کوردیکک و ایشیتدیکک کیجه سویله ان شاه بر حسن صورت بولور دیمکه بو حال ایله سزه امید ویره م بزم طوغریسنی سویلیه جگمی مأمول ایتیمورسکز برابر معتمد کزی ترفیق بیورک شو کوردیکم احوالی و ایشتدیکم سوزلری آنک یاننده افاده ایدرم دیدیکمده خاطره کمدی دکل سکا امنیتسزک ایچون اولیه رق معرض تشکرده خاک پای هایون حضرت شاهانه عیوض حال ترقیمیله عباس پاشا اوغلی و یاخود سامی بکی سکا ترفیق و اعزام ایتکی قوردم لکن عرض حال تقدیمه تأدب ایتدم و آدم ارسالنه بعض مطالب مانع اولدی بقلم سنک وصولندن صکره ذهنه موافق کلور ایسه یه برنی کوندیرم دیمکه سز بیلورسز باری آنلر بزم کبی ساده جه کلوب کتمش اولسه لر دنیلوب عودت اولنمشدر مشارالیه قونسولسره زیاده رعایت ایدوب هر بر مصلحتی آنلرله مذاکره ایتکده اولدیغندن فی الحقیقه قونسولسره هر بر ماده ده استیلا و مداخله لری کورلمش ایدو کندن حتی چاکر کینه لری قرنتنه ده ایکن اسکندریه ده نقدر نفوس وار ایسه بررایکیشر جمله سی مصره کیدوب فقط فرانسه قونسولسی وکیلی قالمشدی قرنتنه ک تکمیل کونی وکیل مرسوم نزد چاکری یه کلوب مأموزیت عاجزانه می آکلامق ایچون خیلی طولاشدیرمش ایسه ده یول لقر دیلری و اسکندریه و مصرک هوالری صحتلریله صاوشدیریلوب و مصره وصول عاجزانه ده عید شریف تعقیب ایتمش اولدیغندن تبریک وسیله سیله جمله سی برر برر کلشلا ایسه ده موسم صحتلریله کچشدیریلوب آنجق روسیه قونسولسی قولونل روحل نمچه قونسولسینی دخی آله رق بر کون مخصوص ورود ایله خیلی اکلنمش اولغله پاشانک حسن اداره سندن وکیلرینک نظام و انتظامندن وعسا کر بحریه و بریه سنک کثرت و مهارتندن و فابریقه لره و زراعت و تجارت خصوصلرینه دقتندن بختله بر طاقم ستایشنده اوله رق قوت مالیه منی دخی ایما قصدیله بوسنه ک محصولی زیاده اولوب کلیتو منفعت حاصل و طوبی بر بچق میلیون کیسه آغچه یه بالغ اوله جغنی اوزون اوزون حساب و افاده ایتدکلرندن صکره پاشانک مرادی اولادلری قوللانیلوب کندوسی راحت ایتمکدر و واقعا مصرک مصالحی کون بکون یولنه کیرمکده وایلرولمکده اولغله راحت ایده بیلور سزده تسهیل ایدرسکز دیملریله بن بومرامنی بیلیمورم بزم مأموریم چونکه کرید وارداتی ترسانه عامره خزینه سنه مربوط اولوب

احمد پاشا حضرتلری قبودان دریا اولدقلرندن و بندخی قپو کتخدالری بولندیغمدن
 برقاج کره یازیلوب بر رابطه بوله مامسی جهتیه تسویه سنه مبنی کوندر دیلر دنیلش
 ایسه ده چونکه پاشا کندولره آچمش اولدیغندن محاب اولیه رق بشقه مأموریتکز
 یوقیدر پاشا سزکله آخر لقردی ایتمیورمی دیمکه ایدم جک اولورسه استماع و معلوماته
 کوره جواب اعطا ایدم بیلورم دینیلوب نمچه قونسلوسی مصرک قوت بریه و بحریه سی
 تقلیلی تکلیف اولنه جق دیو پاشایه سویله مشر اولمز دیور ایدی دیمکه قونسلوس بکلرک
 بری بکا شویله دیدی بنده بوئی قپو یولداشلم تکلیف ایتمزلر دیدم دیو بکاده
 سویله دی دیدنکمه کاشکی نصیحت اولنسه بیهوده بوقدر مصرفه دوچار اوله یور
 دیدکده دیمدنبرو کندوسنک عقل و اداره سندن بحث اولنه یور البته مطالعه ایدر دینیلوب
 بونلرک کلیشی انک کوندرمی اولق یاخود کندولکلرندن ایسه اخشام کیدوب نقل
 ایدم جکلری بدیهی بولمق حسیله اوزادلیوب صدد دکشدرلکده نمچه قونسلوسی
 ینه لقردی اچلمسه چالیش ایسه ده کیرشمه جکی روحل اکلابوب قرنتنه ده یونان
 قونسلوسنه کوجنمشسکز دیو بشقه صحبت اچغله چونکه اسکندریه قرنتنه سی هر آی
 بر قونسلوسک اداره سنده بولنوب چا کر کینه لرینک مدتم یونان قونسلوسنک زمانه
 تصادف ایتمش ویکرمی برکون مدت تخصیصیه طرف عاجزی به خبر ویرلش ایسه ده
 سایه حضرت شاهانه ده را کب اولدیم سفینه هایونه کندو طرفندن کاور واردیانلر
 قویق استمکه قپودانلر قبول ایتمیوب کیفیتی طرف چا کری به بیلدیردکلرنده قبول
 ایتملرینی تا کید ایتمشیدم قونسلوس مرسوم واردیان قویق ایچون ذکی افندی
 و بغوصی صقشدیروب انلرده قونسلوسی برابر استصحاب ایله چا کر کینه لرینی اسکات
 ایچون کلشلا ایش اکرچه مرقوم و مرسومک یانلرنده بفرنگ وارسه ده یونان
 قونسلوسی اولدیغنی درک ایتمه رک واردیان لقردیسی اچیلدیغنی کبی بو صعوبت یونان
 قونسلوسنک ملعتی اوله یور یوخسه قرنتنه اصولی بیلورم بویله دکلدن بن بو
 سفینه ایله یونان حکومتی لیمانه کیتمش اولسم واردیان قبول ایتم بوايه پادشاهمزک
 ملکی و پادشاهمزک سفینه سیدر قونسلوس خلط ایدر اکر واردیانلر کینک
 قرنتنه سنه اعتبار ایتمه جک ایسه وارسون ایتمسون دیدیکمه مکر قونسلوس کوجنوب
 قالقوب کیتدکلری کبی هم چا کر لرینک مدتمه اون کون ضم و هم کینک قرنتنه سنه
 اعتبار اولنماسنی امضا ایتمش ایش هله سایه حضرت شهنشاهیده دکله ده میوب

کندوسی رزیل اولمشیدی روسیه قونسلوسنک دیدیکی بوماده اولمغله بقالم درسعاده ورودمده یونان ایلچیسندن ترضیه طلب ایدم حکم دیو لطیفه اولسدقده یونان قونسلوسی قدیمدنبرو بوراده تجارتله مشغول اولدیغندن بویله شیرلی بیلمدیکنندن اولمشدر کوجنامکزی رجا ایدرز دیمکه باس یوق بویله بویله اداب حرمتی اوکرنور دینلرک عودت ایتمشدر قونسلوسلرک مشار الیهی اولدرجه ثنا ایتلمی و بیوک کوسترملری بهمه حال ضمیمی اولیهرق یا تعلیم ایله خاطر ایچون یاخودجا کرکینه لرینک لسانمی اکلایمق ضمننده اولسی درکار اولوب هر نه ایسه جدا سولش اولسه لر بیله جوق مبالغه لی اولهرق واقعا بریه و بحریه یوزبیک عسکری و مکتبلرده بر آرز عرب چوجوقلری اولدینی تحقیق اولنوب تجارت وکراسته کیلرندن بشقه ایشه یراریرامن سکز قپاق و بش فرقتین ودرت قروت واون قدر بریق وغولت وقوت رکی خارجدن مزین ونمایشی الارغده برطاقم سفینه لری کورلمشدر ایچلرینک نظام و انتظامی وترسانه تعیر اولنان محک کیفیتی راغب قپودان قوللرینک معلومی اولدیغندن ژورنال ایدوب تقدیم ایلمی تنبیه اولمشدر و حسن اداره سی کیفیتی ایسه برطاقم اونمدق حریرلر اطرافنی الوب کندو جر منفعتلریچون هربری کونده برشی ارائه ایدرک و محسناتی ینه کندولری روایت ایلیه رک برطرفدن تجربه ایله اوغراشوب وبرطرفدن پیامدینی شیرلی فرنکلره یاپدیروب کلیتو آچهلر تلف ایتمکده وفی الحقیقه عسکری به مقتضی اشیا وبعضی مهمات احداث ایلدیکی فابریقه لرنده یاپیلوب خارجدن مبايعه به محتاج دکل ایسه ده جوق آچهلر صرف اولنش واولنقده اولهرق کارینی نوقت ایده جکته کسه نک عقلی ایرمز و فقط تجارت ماده سنک یولنی بولش اولوب شویله که عهده سنده اولان محللرک محصولاتی جمله کندو طرفندن مبايعه وفروخت اولنهرق کسه مالنه مالک دکدر وخارجدن کلان اشیا وارزاقی دخی کافه کندوسی مبايعه ایله هرکسه صاعقه در هله بیچاره فلاحلرک چالشملری بوغازلری طوقلغنه کیدر بو سنه کی محصولاتدن بریجق میلیون کیسه اجه تجارتی مبالغه لی ایسه ده یلانی از اولمق اقتضا ایدر زیرا بوسنه بشیوز بیک قنطار پنبه حصوله کلوب بهر قنطاری بشر یوز غروشه اولمغله کوپا کندوسی اصحابندن بهر قنطارینی ایکیشر یوز الیشر غروشه مبايعه ایده کلدیکی افاده اولنش اولدیغنه کوره بهر قنطارده نصف نصفه تجارت ایتمکه یالکز پنبه دن ایکیوز الی بیک کیسه منفعتی اوله یور بو صورتده سویلتیلان نمانک حصولی

ممکن کورنمىدر آنجق اهالى کندو محصوللرى رايجه استدکلىنه صاته ميوپ محتاج اولدقلى اشيائى ايکى قاتنه المردن طولايى امر تعيشده مضطرب اوله رىق کرکى کي دلکبر وعسکرى طائفه سى دخى متفر ايسه لرده اهالى عسکردن وعسکر ضابطانندن قورقوب سکوت ايتمکده درلر چونکه ضابطان عسکرينک چوغى کندو کوله سى و برازى اسكى امکدارى و تربيت کرده سى اولدقلى و معاشلى اويفون اولوب سربستلکلىده کالده اولديغدن بشقه چوغه کندو چراقلى و يروب باغلمش و برازى بربرلىه قرابت پيدايدىرک ارتباط ضرورى حاصل اولمش اولديغنه و ايجلرندن عقلى ايرميانلر حيوان کي بولندقلى مرکز ضالته ثبات و متانت ايدنلر و کندو اسايشلىرى هر برشيئه ترجيح ايلدکلىرندن ماعدا وقايه حاللريچون اللزندن کلىدىکى مرتبه پاشايى باشدن چيقارمغه صرف مفسدت ايلدکلىرینه بناء مصر عسکرينک وجود و نظامى ضابطان طاقنک برمنوال محرر مجلوب اولمىرندن ايجاب ايلدىکى تحقيق و مشاهد اولنمىدر شوال شريفک اون بشمچى بازار ايرتسى کونى لوازم راهيه مزحاضر اولمش اولمغه و داع ايجون پاشايه وارلدقه يازديغى جوابنامه يى و يروب قيو يولداشلىرىمک جمله سنه دعالر ايدرم ديمکله و داع اوله رىق طوغرى مصرک اسکله سى اولان بولاغه اينلوب اسکندريه جانبته عودت اولنمىدر واسکندريه و وصول ايله سفينه هايونه رکوب عاجزانه مده بغوص کلوب در دست ترتيب اولنان يکرمى بشيک کيسه دخى ضم ايله اوتوز بيک کيسه يه ابلاغ اولمىنى و سزه خبر و يرلمىنى پاشا شمىدى يازمش اولمغه ترتيب ايده جکم ديو خبر و يرمش فرداسى کون دخى حرکت و عزيمت قلنمىدر مقتضاي مأموريت چا کرانهم وجهله مصره وصول عاجزانه مده مصلحت مأموره دائر وقوعبولان مجاوبات اينله بعض کوريلوب ايشيديلان و تحقيق و استراق اولنه بيلان حوادث و کيفياتک اوسته کلنلرى بروجه بالا بند بند قلمه النوب عرض و افاده يه اجتسار اولنديغى و مشلر اليه ابتدا هر تقدیر تواضع و بماشاة و بر مقتضاي مأموريت لسان جلب و تأمين قوللانيه رىق مطلوب اولان مرکز ه اماله سنه سعى اولنمش ايسه ده يناشمديغدن بشقه بالا پروازلغى ارتمش اولديغدن ضرورى بعض صحبت آره سنده مناسبت کتوريله رک تعبيرات نازکه و ملايمه ايله حيلى اغر و طوقنقى سوزلر سويلنوب اگرچه طور و معامله سنه فى الجملة تنزل کلمش ايسه ده ينه مصلحتجه ديدىکندن دونماش اولمغه بو صورت کندوسنک بعض طرفدن مأمولى اولمىنى اقتضا ايدر و قونسلوسلرک

بالاده بیان اولنان طور ولسانلری جدی اولدینی حالده ظاهر آ آنی تأیید ایلر ایسه ده
 خفیجه تحقیق عاجزانه مه کوره سلطنت سنییه اطاعت و تابعیت خصوصندن طولایی
 صورتی معلوم دکلسه ده کندوسی صقشدیرلقدده و حتی هرکس مالی کندو صاتسون
 دیه رک ید واحد اصولنک ترکی دخی تکلیف اولنقدده اوله رق واقعا کندوسنک
 فرنکلی زیاده جه مذمت ایتسی و چا کر کینه لرینه اکلاتیمورلر سده بینلرنده تلاش
 واضطراب اولسی دخی بوصورتک صحتی ایجاب ایلش و بو کیفیت جهل محسوسات
 بندکامدن بولنش اولمقله ذیل واشعاره مبادرت قلندینی رهین علم عالی لری بیورلدقدده
 اولبابده و هر حالده امر و فرمان حضرت ولی الامر والاحسان افندمز کدر

